


十界略解



十界略解

京北紅螺山資福寺訥堂老人撰述

京西山遺光寺幻庵比丘杲鑑箋釋

念十法界隨染淨緣

吾人現前一念之心，全真成妄，全妄即真。終日不變，終日隨緣。此明心佛衆生，三無差別。吾人現前一念之心者，的示人人當下反觀。此一念從何而有？如是諦觀，心動分別則有念，不動分別念則無。念無則真心不動，這裏覓佛覓生覓心，了不可得。是爲諸佛心印，祖師單傳，含生性德，萬法本源，渾然一體，豈言說名相可及哉？不得已強名實際理地，纖塵不立。且夫纖塵尙然不

220.7
605.
2

A 020835



立，欲覓差別，大似掘地覓天，撥波求火，無異也。至若全真成妄，此心纔動，念起分別，分別由念，念動於心。斯則不動之真心，全成分別之動念。縱許學道之人，伏念不動，亦逃他妄念不得。何故音你語已有伏念在耳。况乎念念相續，曾無間斷者。故經云，動念息念，皆歸迷悶。是不達一切境界，因念而有。執妄成真，遺真逐妄。若達念空，境界安在。情忘執謝，全妄即真。既全妄即真，終日不變者，全真之體耳。終日隨緣者，妄緣本空耳。既達緣空，真體畢露。如是動作云爲，無入而不自得焉。夫不隨佛界之緣而念佛，便念九界。

上明真心畢露，湛然常住，是爲諸佛自證境界。此明妄識攀緣，昏擾擾相，而爲凡夫所緣境界。緣淨境界，卽四聖法界。謂佛

界，菩薩界，緣覺界，聲聞界。緣染境界，卽六凡法界。謂天界，人界，修羅界，名三善道。畜生界，鬼趣界，地獄界，名三惡道。凡夫起念，若不念佛，必念九界也無疑矣。不念三乘，便念六凡。不念人天，便念三途。不念鬼畜，便念地獄。

此明九界染淨緣殊。不念三乘者，不念知苦斷集慕滅修道之聲聞乘，不念十二因緣之辟支乘，不念六度萬行之菩薩乘，以上三乘，爲出世淨緣也。便念六凡者，爲世間染緣。染緣之中，分善惡二途。不念人天戒善等法，便念三途貪瞋癡等法。不念鬼畜輕惡，便念地獄重惡。染淨聖凡，豈離念而有哉？

以凡在有心想，不能無念。以無念心體，惟佛獨證。自等覺已還，皆

悉有念。

此明離念真心，惟佛獨證。蓋佛者覺也。能覺自心圓滿寂滅，了不可得，是名爲佛。譬如磨鏡，垢盡明現，普照無礙。萬像森羅，炳然齊現，而無留滯。無念真體，圓照法界，亦復如是。是爲諸佛自證境界，如如真體。至若等覺已還者，發明有念。縱許等覺菩薩，修斷已極佛果，尙有微細念相未盡，所以不成妙覺佛位也。况復等覺已下，三賢變易生死，六凡分段生死，安得無念？故云，凡在有心，不能無念也。

凡起一念，必落十界，更無有念出十界外。以十法界，更無外故。每起一念，爲一受生之緣。果知此理而不念佛者，未之有也。

此言法界唯心，一切具造。一念纔興，十界森然。故云凡起一念

，必落十界。一念不生，萬法具寂。故云更無有念出十界外。以十法界因念而有。故云以十法界更無外故。以顯離念更無片法可得也。每起一念爲一受生之緣者，妄動爲因，念起爲緣，隨染淨之緣，受聖凡之報，定然不爽。果知念動必生之理，孰有智者而不反觀念起，頓拋雜念而不念佛者，未之有也。

若此心能與平等大慈大悲，依正功德，以及萬德洪名相應，卽念佛法界也。

此明念起之緣。此心能起慈悲喜捨，四無量心，慈濟一切，悲拔衆苦，歡喜隨順，財法等施。身心正報，器界依報。利益有情，是名功德。以及萬德洪名者，蓋佛因修萬行，果感滿德，一稱洪名，衆德具備，念念相續而不間斷，是名相應念佛法界。所以名

爲佛法界者，而慈悲功德等法，悉是佛界中所用利生之法耳。然此念佛一門，是諸佛最勝方便。卽妄證真，舊路還家者，無越于此。噫。吾人逐念升沉，漂流浩劫，莫知依歸。今生幸遇，且莫錯過。果是真實發心念佛者，大凡惱亂損害衆生之念都莫起。起則念佛應之，久久純熟，自然相應。至若違順境緣，不起憎愛。于諸衆生，勤行慈悲。念念如是，卽此娑婆穢土，便是極樂淨土矣。有志淨業者尤宜深玩。

能與菩提心六度萬行相應，卽念菩薩法界也。

菩薩略，梵語具足，應云菩提薩埵，此翻覺有情，亦云覺心。能覺自心之惡令不起，能覺自心之善而修習，是爲悲智雙運之德也。能修者覺心，所修者六度。心能布施，度自己之慳貪。持戒度

犯。忍毀辱度瞋恚。精進度懈怠。禪定度散亂。智慧度愚癡。度己名自利，度人名利他。以及日用尋常種種作爲，無非二利。故云六度萬行。果能念念與如是法相應，是名菩提心，念菩薩法界也。

以無我心，與十二因緣相應，卽念緣覺法界也。

以無我心者，我空觀也。由我空觀，契無生理，順觀流轉入生滅，逆觀還滅證無生。順觀十二因緣者，謂無明緣行，行緣識，識緣名色，名色緣六入，六入緣觸，觸緣受，受緣愛，愛緣取，取緣有，有緣生，生緣老死憂悲苦惱。無明卽過去執我煩惱。由煩惱故，於諸事理，無所明了，故名無明。由斯無明爲緣，造作種種善惡業行，故云無明緣行。此二支屬過去因。由善惡業行，牽

動識心，轉入胎藏，故云行緣識。識執持故，而成胎中色受想行識五陰，故云識緣名色。名即受想行識四陰屬心，但有其心而無其形。色陰即身，從託胎至五七位，生諸根形，四肢差別，故名爲色。胎中名色增長至七七位，六根圓具，以根有入塵之義，故云名色緣六入。六入成就，月滿出胎，觸對前境，故云六入緣觸。因觸生覺，覺于違順中庸等相，故云觸緣受。受謂覺受，即領納義也。此五支屬現在果。由覺受故，於可欲境，心生貪染，故云受緣愛。愛心熾盛，念念不捨，故云愛緣取。因取起行，造種種業，爲諸有因，故云取緣有。此三支，愛取二支屬煩惱惑，與過去無明同。有支屬業，與過去行同。屬現在因。以因感果，當生後有，還受五陰之身，故云有緣生。有生必死，五陰假和，

不久變壞，故云生緣老死等。憂悲苦惱，乃老死中事，蓋老必憂苦，死必悲惱，此二支又屬未來果。自無明至老死共十二支，三世連環，展轉生起，互相由藉，故名十二因緣。三界因果，不出乎此。是爲順觀流轉生滅門也。逆觀還滅者，自老死逆次而觀，直至無明。如經云由誰有故而有老死？如是老死，復由何緣？用心推審，知老死因生而有，生因有業，業因取生，取因愛生，愛因受生，受因觸生，觸因六入，六入因名色，名色因識，識憑行業所牽，行因無明，如是推審而至無明，是名無法智。以智研窮無明是妄，妄本無因。無因則無生，當下頓滅。故云無明滅則行滅，行滅則識滅，識滅則名色滅，名色滅則六入滅，六入滅則觸滅，觸滅則受滅，受滅則愛滅，愛滅則取滅，取滅則

有滅，有滅則生滅，生滅則老死憂悲苦惱滅。斯則頓斷無明我空理現。是爲逆觀還滅無生門也。因觀生滅因緣而悟道，故名緣覺。其獨覺理同。避繁不錄。此心若能念此因緣等法，是名念緣覺法界也。

以無我心，觀察四諦，卽念聲聞法界也。

觀察四諦者，以生空慧，觀苦集滅道之四諦。苦集二諦爲世間因果，道滅二諦爲出世因果。苦者，世間果，以生老病死爲體。逼迫身心，不得自在。名爲苦諦。集者，世間因，以貪瞋見思煩惱爲體，招感現未苦報。故名集諦。滅者，出世果，以我空涅槃爲體。滅盡諸苦，無生理現。故名滅諦。道者，出世因，以正助道品爲體。能證離苦之理。故名道諦。如是觀察，知苦果。斷集因。慕

滅理。修正道。名聲聞者，因聞佛說四諦聲教，而得修證故。卽小乘四果羅漢也。此心若能念此等法，是名念聲聞法界也。復次。正助道品者，卽五根，五力，七覺支，八正道，四念處，四正勤，四如意足，此共三十七品。能助正修之道，增長不退。故名助法道耳。茲略出總名。樂識其別目者，檢彼教乘法數自知。或念四禪八定，以及上品十善相應，卽念天法界也。

界外四聖以下，發明界內六凡，故云或念。其略欲界十善，蓋欲界天人，雖修十善而無禪定。因修善法勝劣不等，所以報感。或四王天，忉利天，夜摩天，兜率天，化樂天，他化自在天，是名六欲。雖係化生，皆有夫婦欲染之事。故約欲則下重上輕，約善下雜上純爲勝劣。或修四禪，卽離生喜樂禪，定生喜樂禪，離喜

妙樂禪，捨念清淨禪。或修四空定，卽空無邊處定，識無邊處定，無所有處定，非非想處定。連上四禪，故名八定。此二界天人，無有女人，純是男子。蓋欲念不起，乃能修習禪定，方得上升。其優劣不等，約所修禪定淺深爲階降耳。以及上品十善者，修定天人，雜念不起。十善精純，諸惡無犯。是名上品。此心若能念如是法，是名念天法界也。

若與五戒相應，卽念人法界也。

五戒者，戒止殺盜淫妄酒。卽儒教仁義禮智信五常也。不殺卽仁，不盜卽義，不邪淫卽禮，不飲酒卽智，不妄言卽信。持此五法，能感入中最勝果報。故此心若能如斯相應，是名念人法界也。

若修戒善等法，兼懷嗔慢勝負之心，卽落修羅法界也。

戒善等法，卽五戒十善。雖或修之，我見甚重。或見不循情理，以及不順己心者。忿恨念起，瞋恚頓興。貢高我慢，惟勝是好。雖感天福，常修鬥戰。與天諍權，不得自在。梵語修羅，此云非天。以彼無天福故，此心常與如是等法相應，卽落修羅法界也。以上天人修羅，名三善道。以其有戒善等法故。

若以緩輒心，念下品十惡，卽墮畜生法界也。

緩輒心者，雖念十惡等法，或者緩遲，或雖行而兼不忍。不知改悔，終屬愚癡。故墮畜生。此心念如是法，是名念畜生法界也。

或以緩急相半心，與中品十惡相應，卽墮餓鬼法界也。

緩急相半心者，雖念十惡等法，初心或緩，次心或急。貪瞋猛利，故墮餓鬼。此心念此等法，卽念餓鬼法界也。

若以猛熾心，與上品十惡相應，卽墮地獄法界也。

猛熾心者，三毒熾盛，純惡無善。故名上品十惡。觸境發惡行，離境起惡思。若較上二決無輕緩，故墮地獄。此心純念乎此，是名念地獄法界也。其地獄苦報差別等相，略備地藏，避繁不引。

以上畜生餓鬼地獄名三惡道，以其唯念諸惡等法故。

十惡者，卽殺，盜，淫，妄言，綺語，惡口，兩舌，貪，瞋，邪見，是。反此則爲十善。

此明三業所造十種惡業。殺，盜，淫，此三法屬身業所造。綺語，妄言，兩舌，惡口，此四法屬口業所造。貪，瞋，邪見，此三法屬意業所造。縱意任行，名爲十惡。節制戒止，名爲十善。故云反此則爲十善也。

當密自檢點日用所起之念，與何界相應者多，與何界相應者猛。則他日安身立命之處，不勞更問人矣。

密自檢點者，乃訥堂老人頂門一鍼，真有起死回生之妙術，轉凡成聖之功效矣。可謂眉毛拖地矣。當字著眼，吾人不遇斯法則已。幸或遇之，當熟讀其文，深研其義。更當反觀自己，從朝至暮，所起念想，密密檢點。看與何界相應多猛者？不覺汗顏。大段人生世間，最執者我見，最染者五塵，最貪愛者名利而已矣。去此豈更別有真實念頭也哉？嗟乎！營營碌碌，盡生不及，可不哀歎？今訥堂老人，摘心剜胆，血淋淋拋向諸人面前，祇教人死盡偷心，單提一念阿彌陀佛。以念念佛，以佛作念。念卽佛，佛卽念，念佛渾融，孰分自他。念到這裏，是爲相應。則他日安身立

命處，必隨念往生淨土也無疑矣。豈勞更問人歟？否則各從其便，吾莫如之何也已矣。

重印十界略解跋

吳丈蔚若，近出所藏佛像，送湛山精舍供養，陳君朋初偕榮叟詣丈所迎之。丈因出示十界略解一冊，且詔之曰；此解簡明圓澈，便于誦習，倘重加刊印，廣爲流通，亦宣揚佛化增長善緣之一助也。榮叟受而讀之，若有所感。夫全妄卽真，繫於一念。此心如起慈悲喜捨之念，卽入佛菩薩境界，如起殺盜淫妄之念，卽墮餓鬼地獄境界，出此人彼，只在剎那反掌之間，而聖凡升沉，相去乃不可以道里計。訥堂老人嚴於律已，善與人同。旣開圓解於性相二宗，乃復栖心淨土，以念佛攝悟修兩門之要，而返明淨一心之真。誦其書，懷其人，猶想見紅螺山開演參悟，濟濟一堂之勝概焉。杲鑑禪師珍重而箋釋之，良有以也。原書刊於光緒七年，訪之坊間，流通殊少。

國人不知寶貴自身自心，縱欲敗度，泛焉若不繫之舟，而不自知其所終極也。人生到此，豈不痛哉？因以活字版印五千部，分贈諸有緣者誦之。

中華民國二十有五年二月一日桐廬袁榮叟跋

附白 此次印刷五千部付託青島市福山支路青島佛學會代為分送國內各叢林圖書館及佛學團體以供公衆誦覽外埠諸君如有索閱請寄郵票二分便當寄奉

0.7
5